

# Ilusilersuineq pillugu inatsisip Kalaallit Nunaannut atuutilerpera pillugu peqqussut

## UAGUT MARGRETHEP AAPPAAT, Guutip saammaanneragut Danmarkip Dronningia, imaaliorpugut:

Ilusilersuineq pillugu inatsimmi inatsit nr. 1259, 20. december 2000-imeersumi § 61, nioqqusiamik nutaamik illersuinermit inatsisip, ilusilersuineq pillugu inatsisip, nioqqusiat ilisarnaasersorneqartarnerannut inatsisip aamma ilisserusiat pillugit inatsisip allannguutaat pillugit inatsit nr. 451, 10. juni 2003-meersumi § 6 (Ulloq tunniussereerfissaq, Europami nioqqusiat nutaatut illersorneqaataannik nutserinerit, pilersitseqqinneq il.il. pillugit malittarisassat), nioqqusiamik nutaamik illersuineq pillugu inatsisip, piginneqqaartussaannermik inatsisip arlalinnik inatsisitallip allannguutaat pillugit inatsit nr. 1430, 21. december 2005-mimeersumi § 9, imm. 1-2 (Isumaloriaatsikkut pisinnaatitaaffiit atuutinneqarnerat pillugu EF-ip maleruagassiaanik atortuulersitsineq 2004/48/EF), eqqartuussisarnermik inatsisip aamma inatsisit assigiinngitsut allat pillugit inatsisit allannguutaat pillugit inatsit nr. 538, 8. juni 2006-imeersumi § 110, imm. 4 (Politeeqarnerup eqqartuussiwiillu aqqissuuteqqinneqarnerat), nioqqusiat ilisarnaasersorneqartarnerannut inatsisip, pillaasarnermik inatsisip, raatioqarnermik aamma isiginnaarummik ingerlatsinerit pillugit inatsisit kiisalu inatsisit assigiinngitsut allat allannguutaat pillugit inatsit nr. 1404, 27. december 2008-meersumi § 10, imm. 2 (Unioqqutitsilluni assiliinernut il.il. akiuiniarnerit annertusinerat) naapertorlugit aalajangerneqarpoq, inatsisit Kalaallit Nunaannut atuutissasut, taamaalilluni ilusilersuineq pillugu inatsit Kalaallit Nunaannut atuutilerpoq ulloq 1. juli 2010-miit ima oqaasertaqarluni:

### Kapitali 1

#### *Aalajangersakkat nalinginnaasut*

§ 1. Inuk, ilusilersugaliorsimasoq (ilusilersuisartog) imaluunniit inuk, ilusilersuisartup piginnaatitaaffinik nuutsivigineqarsimasoq, inatsit manna naapertorlugu ilutsimut kisermaassisutut nalunaarsorneqarnermik pissarsisinnaavoq (designret), tak. § 9.

§ 2. Matumani inatsimmi paasineqassaaq

- 1) "ilusilersugaq": piliap imaluunniit piliap ilaata isikkuata, piliap nammineq imaluunniit taassuma kusassaataata immikkuullarissutaa, pingaartumik killinginut, sinarsuanut, qalipaataanut, ilusaanut, katitigaaneranut imaluunniit atortuanut tunngatillugu,
- 2) "piliaq": suliffissuaqarnikkut imaluunniit assassornikkut nioqqutissiaralugu sananeqarsimasoq, tassunga ilaallutik ilaatigut ilaannakortat, ataatsimoortillugit katiterneqarnermikkut piliarineqartussat, kiisalu poortuutit, atortut, ilusilersorlugit ilisarnaasiat aamma ilioraalluni allariaatsit, kisianni qarasaasiatigut malitassiaanngitsut,
- 3) "piliaq katitigaq": piliaq, arlalinnik ilaannakortalik, taarserneqarsinnaasunik, taamaalilluni piliaq avissaartinneqarsinnaasoq katiteqqinneqarsinnaallunilu.

§ 3. Ilutsimut kisermaassisutut nalunaarsorneqarneq taamaallaat pineqarsinnaavoq, iluseq nutaajuppat namminerisaminillu immikkuullarissuseqarluni.

*Imm. 2.* Ilusilersugaq nutaatut isigineqartarpoq, ulloq qinnuteqaammik tunniussivissaq imaluunniit, tulleriiarinermi salliutinneqarnissaq patsisilersuutigineqarsimappat salliutinneqarnissamut ulloq sioqqullugu ilusilersukkap assinganik tamanit pissarsiarineqarsinnaasunngortoqarsimanngippat, tak. § 16. Ilusilersukkat assigiittut isigineqassapput, immikkuullarissusaat taamaallaat ilusaata pingaangitsortaaniippata.

*Imm. 3.* Iluseq namminerisaminik issuseqartutut isigineqartarpoq, atuisup ilisimasaqareersup ilutsip tamarmiusup qimerloornerani, ilutsinit allanit tamanit pissarsiarineqarsinnaanngorsimasunit ulloq tunniussiviusussa q sioqqullugu imaluunniit tulleriiarinermi salliutinneqarnissaq patsisilersuutigineqarsimappat salliutinneqarnissap ulluani, tak. § 16, tamaata qimerloorneratigut, atuisartup taamaattup immikkoorutaanik maluginiagaqarfipigpagu. Ilutsip namminerisaminik issuseqarneranik naliliinermi, ilusilersuisartup ilutsimik ineriartortitsinermini kiffaangissuseqarsimanerata annertussussaa isiginiarneqassaaq.

§ 4. Piliap katitikkap ilaannakortaanut ilusilersugaq taamaallaat nutaatut namminerisaminillu issuseqartutut isigineqartarpoq

- 1) ilaannakortaq piliami katitikkamut ilanngunneqaruni piliamik nalinginnaasumik atuinermi suli takussaasoq aamma
- 2) ilaannakortap takussaasortaata nutaaliaanermut namminerisamillu issuseqarnermut piunasaqaatit eqquutippagit.

*Imm. 2.* Nalinginnaasumik atuneq paasineqassaaq atuisartuiup piliamik katitikkamik atuinera, aserfallatsaaliuineq, suliarinninneq iluarsaasinerluunniit ilanngunnagit.

§ 5. Ilusilersugaq tamanit pissarsiarineqarsinnaavoq, nalunaarsorneqarnermut atatillugu tamanut saqqummiunneqarsimappat imaluunniit allatut tamanut saqqummiunneqarsimappat, imaluunniit saqqummersinneqarsimappat, aningaasarsiutitut atorneqarsimappat imaluunniit allatut ilisimaneqalersimappat.

*Imm. 2.* Ilusilersugarli tamanit pissarsiarineqarsinnaanngorsimasutut isigineqarneq ajorpoq

- 1) pissutsini, Den Europæiske Unionimi imaluunniit Kalaallit Nunaanni fagkreditsit niuernerme ingerlatseriaatsitik nalinginnaasut aqutugalugit, pineqartup immikkoortortaqarfiani pissutsit imm. 1-imi taaneqartut ilisimalersinnaanngippatigit, tamanit pissarsiarineqarsinnaanngorsimanngippat ulloq qinnuteqaatip tunniunneqarfia imaluunniit, tulleriiarinermi salliutinneqarnissaq patsisilersuutigineqarsimappat salliutinneqarnissap ullua sioqqullugu, tak. § 16, imaluunniit
- 2) ersarissumik imaluunniit taama paasineqarsinnaasumik tatigeqatigiinnissamik piunasaqaatit aqutugalugit ilusilersukkamut allat ilisimasaqalersimappata.

§ 6. Ilusilersugaq tamanit pissarsiarineqarsinnaalersimasutut isigineqarneq ajorpoq, qaammatit 12-it iluanni ulloq qinnuteqaatip tunniunneqarfissaa imaluunniit, tulleriiarinermi salliutinneqarnissaq patsisilersuutigineqarsimappat salliutinneqarnissap ullua sioqqullugu, tak. § 16, saqqummiisoqarsimappat

- 1) ilusilersuisartumit imaluunniit inummit, ilusilersukkamik ilusilersuisartup piginnaatitaaffiinik nuutsivigineqarsimasumit, imaluunniit allamit paasissutissanik ilisimatinneqarsimasumit, imaluunniit iliuseqarfingineqarsimasumit, ilusilersuisartumit imaluunniit inummit, ilusilersukkamut ilusilersuisartup piginnaatitaaffiinik nuutsivigineqarsimasumit pisumit, imaluunniit

- 2) ilusilersuisartumut imaluunniit inummut, ilusilersukkamut ilusilersuisartup piginnaatitaaffiik nuutsivigineqarsimasumut tunngatillugu atornerluinerup kingunerisaanit.

**§ 7.** Ilutsimut kisermaassisutut nalunaarsorneqarneq pissarsiarineqarsinnaangilaq, ilusilersugaq

- 1) pissuserissaarnissamut imaluunniit ileqqorissaarnissamut naleqqutinngippat,
- 2) siulliulluni ilusilersugaasimasumut naleqqutinngippat, aatsaat tamanit pissarsiarineqarsinnaangortoq ulloq qinnuteqaatip tunniunneqarfiata imaluunniit, tulleriarinermi salliutinneqarnissaq patsisilersuutigineqarsimappat salliutinneqarnissap ulluata kingorna, tak. § 16, aamma naatsorsuutigereerlugu, siulliulluni ilusilersukkamut ulloq qinnuteqarfissaq ilusilersukkap nutaap qinnuteqarfissatut ulluanit siuliusoq,
- 3) akuerineqanngitsumik
  - a) suliffissuaqarnermut tunngatillugu piginnittussaassuseqarnermik illersuinissaq pillugu Parisimi isumaqatigiissummi immikkoortortami 6 c-imi taaneqarsimasut tunngaviusut ilaat atoraanni, imaluunniit ilisarnaatinik, saqqarmiuusanik aamma ilisarnaatinik allaanernik atuinermi, qulaani isumaqatigiissummi taaneqartumi immikkoortortami 6 c-imi ilaanngitsunik, aamma tamanit immikkut ilisimaneqartuusunik,
  - b) allap nioqqutissanut ilisarnaataa, firmaata imaluunniit niuernerme ilisarnaataa alla atoraanni,
  - c) piginneqqaartussaannerme inatsisikkut illersorneqartumik piliamik atuinermi,
  - d) siulliulluni ilusilersugaasimasumik imaqarpat.

*Imm. 2.* Siulliulluni ilusilersugaq paasineqassaaq ilusilersugaq, illersorneqartoq

- 1) nunami maani qinnuteqaatigineratigut imaluunniit nalunaarsorneqarneratigut,
- 2) EF-design qinnuteqaatigineratigut imaluunniit taamatut nalunaarsortinneratigut,
- 3) nalunaarsorneqarsimanani EF-designi imaluunniit
- 4) nunami maani atuuttumik nunat tamat akornanni qinnuteqaatigalugu imaluunniit nalunaarsorneratigut.

**§ 8.** Ilutsimut kisermaassisutut nalunaarsorneqarneq (designret) pissarsiarineqarsinnaangilaq piliap ilaata isikkuanut

- 1) piliap teknikkikkut pisinnaasaanut taamaallaat tunngatinneqartumut, imaluunniit soorlu
- 2) ilusaa annertuneralu eqqoqqissaarlugit assilillugu suliareqqitassaappat, taassuma piliap, ilusaa, maskinat atorlugit piliamut allamut atassuserneqarsinnaappat imaluunniit inissinneqarsinnaappat tassani, qaavani eqqaani imaluunniit piliamut allamut atassuserneqarluni, taamaalillutik piliat marluullutik atuuffissaminnik naammassinnillutik.

*Imm. 2.* Imm. 1, nr. 2-mi aalajangersagaq apeqqutaatinnagu ilutsimut kisermaassisutut nalunaarsorneqarneq pissarsiarineqarsinnaavoq, ilutsimut § 3 naapertorlugu nutaajusumut namminerisaminillu immikkuullarissuseqartumut, iluseq pilianik assigiinngisitaartunik ataatsimut sananeqarsinnaasuliaappat imaluunniit immikkuualuttunik taarserneqarsinnaasunit ataatsimoorsitsinermi immikkoortukkaat kattutsillugit sananeqarsinnaappat.

**§ 9.** Ilutsimut kisermaassisutut nalunaarsorneqarnerup nassataraa, §§ 10-12-ip kingunerannik ilanngutinngitsoortut ilanngullugit, kinaluunniit kisermaassisutut nalunaarsorneqarsimasumit akuersissummik peqartinnani ilutsimik atuisinnaanginnera. Taamatut atuinermi pineqarnerupput sanaartorneq, neqerooruteqarneq, pilerisaarineq, eqqussineq imaluunniit piliamik, ilutsimut tunngasumik, imaluunniit piliamik taamaattumik, taaneqartutut siuneqartaqarluni toqqorsineq.

*Imm. 2.* Imm. 1 naapertorlugu ilutsimut kisermaassisutut nalunaarsorneqarnermi pineqarput ilutsit tamarmik, atuisup ilisimasaqareersup ilutsip tamarmiusup qimerloornerani allaanerussutaanik maluginiagaqarfinginngippagu. Ilusilersuisartup ilutsimut kisermaassisutut nalunaarsorneqarnerata

annertussusaata nalilernerani isiginiarneqassaaq, ilusilersuisartup ineriartortitsinermini kiffaanngissuseqarsimanerata annertussussaa.

**§ 10.** Ilutsimut kisermaassisutut nalunaarsorneqarneq ukununnga atatillugu suliarineqarsinnaanngilaq

- 1) iliuitsit, nammineq inuttut inuuneq isigalugu iliuserineqartut,
- 2) iliuitsit, misileraaneq siunertaralugu iliuserineqartut, aamma
- 3) issuaalluni tigulaarinermi imaluunniit atuartitsinermut atatillugu atuinermi, naatsorsuutigereerlugu taamatut iliuseqarnerup niuernermi ileqqorissaarnimut naleqquttuunissaa aamma nalinginnaasumik atuinerup annertussusaata naleqqutinngitsumik iluseq ajoqusissanngikkaa, aamma naatsorsuutigereerlugu najoqqutarisat nalunaarneqarssimanissaat.

**§ 11.** Aammattaq ilutsimut kisermaassisutut nalunaarsorneqarneq ukununnga atatillugu suliarineqarsinnaanngilaq

- 1) umiarsuarni silaannakkullu angallatini, nunami allami angerlarsimaffeqartuni, taakku nunami maaniikkallarnerini, aamma
- 2) iluarsaassinissaq siunertaralugu nunamut maanga kingoraartissat ilaannik pisattanillu eqqussineq kiisalu umiarsuarnik silaannakkullu angallatinik taamaattunik iluarsaassinermi.

**§ 12.** Ilutsimut kisermaassisutut nalunaarsorneqarnermi pineqanngillat iliuitsit pilianut ilutsitut illersorneqaatilinnut atasut, piginnittumit imaluunniit taassuma akuersissutaanik peqarluni Det Europæiske Økonomiske Samarbejdede (EØS) iluani tuniniarneqartut.

## Kapitali 2

### *Ilutsip nalunaarsorneqarnissaanik qinnuteqarneq*

**§ 13.** Ilutsip nalunaarsorneqarnissaanik qinnuteqaat Patent- og Varemærkestyrelsimut tunniunneqassaaq.

*Imm. 2.* Qinnuteqaat imaqassaaq qinnuteqartup aqqanik imaluunniit firmamik paasissutissanik kiisalu ilutsip allaaserineranik.

*Imm. 3.* Qinnuteqaammut aamma ilanngullugu tunniunneqarsinnaavoq assilillugu sanaaq. Taamaattoqarpat assilillugu sanaaq ilutsimik nalunaarsuinermi tunngaviussaaq.

*Imm. 4.* Nalunaarsorneqarnissamik inuk ilutsimit pilersitsisuunngitsoq qinnuteqarpat, qinnuteqartup imaluunniit ilusilersuisartup qinnuteqaateqarneratigut ilutsinik nalunaarsuiffimmi allanneqassaaq, kiap iluseq pilersissimaneraa. Iluseq ilusilersuisartut arlallit suleqatigiinnerisa inernerippassuk, ilusilersuisartut eqimattat pineqartut nalunaarneqarnerisa ilusilersuisartut ataasiakkaat nalunaarneqarnissaraluannik taarsiissaaq.

*Imm. 5.* Qinnuteqaammut ilaassaaq akiliut aalajangersarneqarsimasoq.

**§ 14.** Qinnuteqaammut inatsisitigut taamaallaat atuutilersitsisoqarsinnaavoq ullormit, qinnuteqartoq ilutsip assilineranik imaluunniit assilillugu sananeranik tunniussippat.

*Imm. 2.* Qinnuteqaat qinnuteqaammi takuneqarsinnaasunit allanngortinneqarsinnaanngilaq ilutsimut allamut tunngatilerlugu.

**§ 15.** Qinnuteqaammiissinnaapput ilutsit arlallit, ilutsini atorineqartussani piliat immikkoortukkaamut ataatsimut atatinneqarsinnaappata, tak. Locarnomi nunat tamat akornanni

suliffissuaqarfinnut tunngatillugu ilutsinik aamma assilillugit sanaanik immikkoortiterisarnermut tunngatillugu aaqquissuuseq atsiorneqartoq ulloq 8. oktober 1968-imi (Locarnoarrangement).

**§ 16.** Iluseq ilutsip nalunaarsorneqarnissaanik imaluunniit ilisserusiap illersorneqarnissaanik qinnuteqaammiippat nunami allami, suliffissuaqarnermut tunngatillugu piginnittussaassuseqarnermik illersuinissaq pillugu Parisimi isumaqatigiisummi 20. marts 1883-meersumut ilaasumi, imaluunniit Verdenshandelsorganisationenimut (WTO) ilaasortaasumi, aamma ilutsip nunami maani nalunaarsorneqarnissaa qinnutigineqarpat nunami allami ullormit qinnuteqarfigeriigassamiit qaammatit 6-it qaangiutsinnagit, taava qinnuteqaat § 3 aamma § 7, imm. 1, nr. 2 aamma 3-mut atatillugu qinnuteqartup qinnuteqaateqarneratigut qinnuteqaat nunami maani tunniunneqarneranut peqatigitillugu tunniunneqartutut isigineqassaaq.

*Imm. 2.* Imm. 1 malillugu tulleriiaarinermi salliutinneqarnissamut piginnaatitaaffik assinganik atuuppoq, naak siusinnerusukkut illersorneqarnissamik qinnuteqaat nunamit isumaqatigiisummut imaluunniit WTO-mut ilaanngitsumit pisuugaluartoq, Danmarkimi ilutsimut qinnuteqaammi tulleriiaarinermi salliutinneqarnermut assinga, nunami tassani, qinnuteqaatip siusinnerusukkut tunniunneqarfigisaani akuersissutigineqarpat, aamma nunami pineqartumi inatsisiliorneq annertuutigut Parisimi isumaqatigiisummut naapertuuppat.

*Imm. 3.* Imm. 1 malillugu tulleriiaarinermi salliutinneqarnissamut piginnaatitaaffik aamma assinganik atuuppoq, iluseq nunami maani ilutsip nalunaarsorneqarnissaanik imaluunniit ilisserusianik illersorneqarnissaanik qinnuteqaammiippat.

*Imm. 4.* Nunami maani ilutsip nalunaarsorneqarnissaanik qinnuteqaat tunniunniunneqarpat, ilutsip siullermeerluni pisortatigoortumik imaluunniit pisortatigoortumik akuerineqartumik nunat tamat akornanni saqqummersitsinermi takutinneqarneranit kingusinnerpaamik qaammatit 6-it kingorna, taava qinnuteqaat § 3 aamma § 7, imm. 1, nr. 2 aamma 3-mut atatillugu qinnuteqartup qinnuteqaateqarneratigut qinnuteqaat ullormit tassannga tulleriiaarinermi salliutinneqassaaq. Saqqummersitsinerni taaneqartuni taamaattuni pineqarput, nunat tamat akornanni saqqummersitsinernut tunngatillugu isumaqatigiisummi nassuiarneqarsimasut, atsiorneqartut Parisimi ulloq 22. november 1928 kingullermillu nutarterneqartoq ulloq 30. november 1972.

**§ 17.** Patent- og Varemærkestyrelsi qinnuteqaat ilutsimut tunngasuunersoq nakkutigissavaa, tak. § 2, nr. 1, aamma § 7, imm. 1, nr. 1-imi aalajangersagaq nalunaarsorneqarnissamut ajoqutaannginnissoq. Kiisalu nakkutigineqassaaq, qinnuteqaat ilutsimik ataasiinnarmik imaqarnersoq, takuulli § 15.

*Imm. 2.* Qinnuteqartup Patent- og Varemærkestyrelsi piumaffigisinnaavaa ilutsimut piginnaatitaaffinnut tunngatillugu pissutsit allat sunniuteqarsinnaasut misissorumallugit, styrelsi ilisimasaqarfigisai. Piumasaqarnermut akiliut aalajangerneqarsimasoo akilerneqassaaq.

*Imm. 3.* Økonomi- og Erhvervsministeri misissuinissamut taassumalu annertussusissaanut malittarisassanik ersarinnerusunik aalajangersaasaaq kiisalu misissuinerneq akiliutissamut.

**§ 18.** Qinnuteqaatip najoqqutassat malippagit, nalunaarsorneqarnissaanullu ajoqutaasussaqaanngippat, iluseq nalunaarsorneqassaaq. Nalunaarsuineq Patent- og Varemærkestyrelsimit tamanut saqqummiunneqassaaq. Tamanut saqqummiussineq qaammatit 6-it angullugit kinguartinneqarsinnaavoq ullormit qinnuteqarfimmiit imaluunniit ullormit tulleriiaarinermi salliutinneqarfimmiit, salliutinneqarnissaq patsisilersuutigineqarsimappat, tak. § 16, qinnuteqartoq tamatuminnga qinnuteqaammini piumasaqarsimappat.

**§ 19.** Qinnuteqartup qinnuteqarnermut najoqqutassat aalajangersimasut misissorsimanngippagit, imaluunniit aamma Patent- og Varemærkestyrelsi isumaqarpat, nalunaarsuinissaq

ajoutissartaqartoq, tamanna pillugu qinnuteqartoq ilisimatinneqassaaq ersarinnerusumillu piffissaliunneqartup nalunaarneqarsimasup qaangiutinnginnerani kajumissaarneqassaaq oqaaseqaateqaqqullugu imaluunniit qinnuteqaammik iluarsiinissamut iliuuseqaqqullugu.

*Imm. 2.* Qinnuteqartoq piffissaliunneqartup qaangiutinnginnerani oqaaseqaateqarnissaminut imaluunniit qinnuteqaammik iluarsiinissaminut kajumissaarneqarnerminut iliuuseqaqqippat, taanna unitsinneqassaaq. Taanna imm. 1-imi ilisimatitsineq taaneqartoq tamatuminnga paasissutissamik imaqaassaaq.

*Imm. 3.* Qinnuteqaammik suliaqarneq aallarteqqinneqarsinnaavoq, qinnuteqartoq qaammatit 2-t piffissaliullugu aalajangerneqarsimasup qaangiunneraniit suliarineqaqqilernissaanik qinnuteqartup qinnuteqaammullu akissutissaminik imaluunniit iluarsissutiminik tunniussippat, kiisalu piffissaliullugu taaneqartoq qaangiutsinnagu suliarinneqqilernerminut akiliut aalajangerneqarsimasooq akilerlugu. Ataasiaannarluni suliarinneqqilertoqarsinnaavoq.

*Imm. 4.* Patent- og Varemærkestyrelsi isumaqartup qinnuteqaatip akuerineqarnissaanut ajoqutissaqartoq, aamma qinnuteqartoq ajoqutaasoq oqaaseqarfigissallugu periarfissaqarsimappat, qinnuteqaat itigartinneqassaaq, Patent- og Varemærkestyrelsi qinnuteqartup imm. 1-imi pineqartumik kajumissaarneqaqqinnissaanut allamik tunngavissaqartitsilinnippat.

**§ 20.** § 19 malillugu Patent- og Varemærkestyrelsi nalunaarsuinissamut ajoqutissamik nassaarpat, iluseq ilusaa allanngortillugu nalunaarsorneqarsinnaavoq, ilutsip ilutsini allanngortillugu illersorneqarnissamut piumasqaatit eqquutippagit nammiuniussutsiminillu attasiinnaarluni.

*Imm. 2.* Qinnuteqartoq Patent- og Varemærkestyrelsip imm. 1-imi iluseq allanngortillugu nalunaarsorneqarneq naapertorlugu aalajangiineranut isumaqataannippat, qinnuteqaat itigartinneqassaaq.

### Kapitali 3

#### *Tamanut saqqumisuuneq ilisimatitsisussaataanerlu*

**§ 21.** Ullormit tassanga ilutsip nalunaarsorneqarneraniit, suliami allagartat kimilluunniit pissarsiarineqarsinnaanngussapput.

*Imm. 2.* Qaammatit 6-it ingerlareerpata ullormit qinnuteqarnermiit imaluunniit ullormit tulleriarnermi salliutinneqarnermiit, salliutinneqarnissaaq patsilersuutigineqarsimappat, tak. § 16, suliami allagartat, naak § 18 naapertorlugu tamanut saqqummiunneqarsimanngikkaluartut, kimilluunniit pissarsiarineqarsinnaanngussapput. Unitsitsinissamik imaluunniit itigartitsinissamik aalajangertoqarsimappat, suliami allagartat pissarsiarineqarsinnaanngortinneqassanngillat, qinnuteqartup suliap aallarteqqinneqarnissaa piumasarinngippagu imaluunniit itigartitsinermik nalunaarut naammagittaalliutiginngippagu.

*Imm. 3.* Qinnuteqartup piumasaqarneratigut suliami allagartat imm. 1 aamma 2-mi allassimasunit siusinnerusukkut pissarsiarineqarsinnaanngortinneqarsinnaapput.

*Imm. 4.* Imm. 2 imaluunniit 3 naapertorlugu suliami allagartat pissarsiarineqarsinnaanngorpata, tamanna pillugu tamanut saqqummiussisoqaassaaq.

**§ 22.** Qinnuteqartoq, inummut allamut ilutsip nalunaarsorneqarnissaanik qinnuteqaammik patsilersuuteqartoq, suli qinnuteqaatit suliami allagartat tamanit pissarsiarineqarsinnaanngunngitsut, piumasaqarfigineqarnermigut pineqartoq periarfississavaa suliami allagartanik ilisimasaqalernissaanut.

*Imm. 2.* Inuk, inummut allamut toqqaannartumik imaluunniit annoncetigut imaluunniit pilianut imaluunniit taakku poortuutaannut allattukkatigut imaluunniit allatut nalunaarpat, iluseq

nalunaarsugaasimasoq imaluunniit nalunaarsugaanissaa qinnutigineqarsimasoq, peqatigisaanik nalunaarsorneqarnermut imaluunniit qinnuteqaammut normu nalunaarnagu, pisussaaffeqarpoq pisariaqanngitsumik utaqqisitseqqaarani taassuminnga piumasaqartoq, taamaattumik paasissutissamik tunissallugu. Ersarissumik nalunaarneqanngippat, ilutsip nalunaarsorneqarsimanera imaluunniit nalunaarsorneqarnissaata qinnutigineqarsimanera, paasissutissalli isumaqarnarsitippassuk taamaattoqanngitsoq, pisariaqanngitsumik utaqqisitseqqaarani piumasaqartoqarneratigut paasissutissiisoqassaaq, iluseq nalunaarsorneqarsimangersoq imaluunniit nalunaarsorneqarnissaa qinnutigineqarsimangersoq.

## Kapitali 4

### *Ilutsip nalunaarsorsimaneqarnerata atuussinnaaffia*

§ 23. Ilutsip nalunaarsorsimaneqarnera piffissami piffissaniluunniit tallimani atuuttarpoq, qinnuteqaatip tunniunneqarneraniit, ullormit qinnuteqarfimmit naatsorsorneqartussaq. Piumasaqartoqarneratigut nalunaarsorsimaneqarnerq nutarteqqinneqarsinnaavoq piffissanut katillugit ukiunik 25-nik sivisussuseqartunut. Piffissat tamarmik aallartittarput piffissaliussap siulliup naaneraniit.

*Imm. 2.* Imm. 1 apeqqutaatinnagu nalunaarsorsimaneqarnerq sivisunerpaammik ukiuni 15-ini atuussinnaavoq ilaannakortassatut ilutsimut, ataatsimoortillugu katiterneqarnermigut piliarineqarnermini iluarsaanerme atornerqartussamut, taamaalilluni piliaq isikkutoqqamisut isikkoqalerseqqillugu.

§ 24. Nalunaarsorsimaneqarnerup nutarterneqarnissaanik qinnuteqarnerq pissaaq nutarterisitsinermut akiliutaasartup aalajangersarneqarsimasup Patent- og Varemærkestyrelsimut akilerneratigut nalunaarsorsimaneqarnermut piffissarititaasup naanissaa siusinnerpaamik qaammatinik 3-nik sioqqullugu aamma kingusinnerpaamik qaammatit 6-it kingorna. Nutarterisitsinermut akiliut nalunaarsorsimaneqarnermut piffissarititaasup naanerata kingorna aatsaat akilerneqarpat, akiliut annertusisaq akilerneqassaaq.

*Imm. 2.* Patent- og Varemærkestyrelsi nutarterisitsinermut akiliutaasartumik aalajangerneqarsimasumik akileeqqusissaaq ilutsimik piginnittumit imaluunniit taassuma fuldmægtigianit. Styrelsi pisussaataitaanngilaq akileeqqusissutit amigaataasut akilersinniarnissaannut sulisussaqarnissaaq akisussaaffigissallugu.

*Imm. 3.* Nutarterisitsinermut akiliutaasartooq aalajangersarneqarsimasoq nalunaarsorsimaneqarnermut piffissarititaasup naaneraniit kingusinnerpaamik qaammatit 6-it kingorna akilerneqarsimanngippat, nalunaarsorneqarsimaneq suujunnaarsinneqassaaq.

*Imm. 4.* Nalunaarsorsimaneqarnermik nutartereqqinneq tamanut saqqummiunneqassaaq.

## Kapitali 5

### *Eqqartuusiniikkut nalunaarsorsimaneqarnerup atorunnaarnera imaluunniit aqutsiniikkut misiliisitsineq il.il.*

§ 25. Iluseq nalunaarsorneqareeraangat, kinaluunniit Patent- og Varemærkestyrelsimut piumasaaqammik saqqummiussisinnaavoq nalunaarsorsimaneqarnerup tamarmiulluni ilaannakuataluunniit suujunnaarsinneqarnissaanik. Piumasaaqat taamaallaat peqquteqartinneqarsinnaavoq

- 1) nalunaarsuineq §§ 1 – 8-imi naapertuutinngitsumik ingerlanneqarsimappat,

- 2) qinnuteqaat § 14, imm. 2-mut akerliusumik allanngortinneqarsimappat,
- 3) § 15-imi piumasagaatit eqquutinneqarsimanngippata imaluunniit
- 4) nalunaarsorneqarsimaneq ukiut 15-it sinnerlugit atatiinnarneqarsimappat § 23, imm. 2-mut akerliusumik.

*Imm. 2.* Imm. 1 malillugu piumasagarneq taamaallat saqqummiunneqarsinnaavoq

- 1) ilutsimut piginnaatitaaffeqarnermut tunngatillugu inummit, inatsisitigut ilutsimut piginnittuunerartumit,
- 2) § 7, imm. 1, nr. 2 aamma 3, litra b-d-imi piginnaatitaaffinnut taaneqartunut tunngatillugu inummit, inatsisitigut ilutsimut pineqartunut piginnittuunerartumit,
- 3) § 7, imm. 1, nr. 3, litra a-mi taaneqartunik piginnaatitaaffinnik atuinermut tunngatillugu, inummit, atuinermut eqqorneqartumit.

*Imm. 3.* Suliaq ilutsimut tunngasoq eqqartuussivinni inaarutaasumik aalajangiiffigineqarsimanngippat, imm. 1 malillugu piumasagaammik ilutsimut tunngatillugu saqqummiisoqarsinnaanngilaq. Iluseq pillugu eqqartuussivimmu suliaassiisoqarpat, suli imm. 1 malillugu piumasagaateqarsimanermut ilutsimut tassunga inaarutaasumik aalajangiisooqanngitsoq, Patent- og Varemærkestyrelsen imaluunniit Patentankenævnet piumasagaateqarsimanerup suliarinera unitsikkallassavaat, suliap inaarutaasumik aalajangiiffigineqarnissaata tungaanut, piumasagaat ilutsimut piginnittumit saqqummiunneqarsimanngippat.

*Imm. 4.* Imm. 1 naapertorlugu piumasagaateqarnermut akiliut aalajangersimasoq akilerneqassaaq.

**§ 26.** § 25 malillugu piumasagarneq uppernarsaammik ilaqartinneqassaaq. Uppernarsaammut taamaattumut atortoq naammanngippat, Patent- og Varemærkestyrelsen piumasagaammut isummernissaminut atortunik allanik piumasagaarsinnaavoq.

*Imm. 2.* Piumasagarneq ilutsimut nalunaarsorneqarsimanermut piginnittuunngitsumit saqqummiunneqarpat, piginnittoq atortut tunniunneqarsimasut pillugit ilisimatinneqassaaq tamatumunngalu oqaaseqaateqarnissaminut periarfissaqassalluni.

**§ 27.** Ilutsimik nalunaarsuineq eqqartuussinikkut tamarmiutillugu imaluunniit ilaannaa atuutinngitsutut aalajangerneqarsinnaavoq

- 1) nalunaarsuineq §§ 1 – 8 naapertorlugit ingerlanneqarsimanngippat,
- 2) qinnuteqaat § 14, imm. 2-mut akerliusumik allanngortinneqarsimappat,
- 3) § 15-imi piumasagaatit eqquutinneqarsimanngippata imaluunniit
- 4) nalunaarsorsimaneqarneq ukiut 15-it sinnerlugit atatiinnarneqarsimappat § 23, imm. 2-mut akerliusumik.

*Imm. 2.* Kinaluunniit imm. 1 malillugu eqqartuussivimmu suliaassanngortitsinnaavoq. Suliarli taamaallaat suliaassanngortinneqarsinnaavoq

- 1) ilutsimut kisermaassisussaataitanermut tunngatillugu inummit, inatsisitigut ilutsimik piginnittuunerartumit,
- 2) § 7, imm. 1, nr. 2 aamma 3, litra b-d-imi piginnaatitaaffinnut taaneqartunut tunngatillugu inummit, inatsisitigut ilutsimut pineqartunut piginnittuunerartumit,
- 3) § 7, imm. 1, nr. 3, litra a-mi taaneqartunik piginnaatitaaffinnik atuinermut tunngatillugu, inummit, atuinermut eqqorneqartumit.

*Imm. 3.* Imm. 2, nr. 1 naapertorlugu suliat suliaassiissutigineqassapput pineqartup nalunaarsorneqarsimaneq pissutsillu ilai, suliaassiissutigineqartumut tunngaviusut, pillugit paasisaqarneraniit kingusinnerpaamik ukiut ataatsip kingorna. Nalunaarsorneqarnerup pinerani imaluunniit ilutsimut kisermaassilluni nalunaarsorsimanerup pineqartumut ingerlateqqinneqarnerani ilutsimik piginnittoq ajortumik isumaqarsimanngippat, suliaq ilutsip nalunaarsorneqarneraniit ukiut 3-t sinnerlugit qaangiunneranniit suliaassiissutigineqarsinnaanngilaq.



*Imm. 4.* Iluseq atuutsinngitsutut nalunaarutigineqarsinnaavoq, ilutsimut piginnaatitaaffiup atuukkunnaarnerata kingorna imaluunniit ilutsimut kisermaassilluni nalunaarsorsimanermik taamaatitsisoqarpat.

**§ 28.** Ilutsip nalunaarsorneqarsimanera ilusaa allangortillugu attatiinnarneqarsinnaavoq, ilutsip ilusini allangorsimatillugu illersorneqarnissamut piumasaqaatit eqquutippagit namminiussutsinilu attatiinnarlugu.

*Imm. 2.* Ilutsimut piginnittoq ilutsip ilusaa allangortillugu nalunaarsorneqarnerata attatiinnarneqarnissaanut aalajangiinermut isumaqataangippat imaluunniit allanguineq pillugu tamanut nalunaaruteqarnissamut akiliut aalajangersimasoq akilinngippagu, nalunaarsorneqarsimaneq suujunnaarsinneqassaaq.

**§ 29.** Inuk ilutsimut qinnuteqaatigineqarsimasumut imaluunniit nalunaarsorneqarsimasumut piginnaatitaaffeqarnerarpat, Patent- og Varemærkestyrelsip tamanna qularnartoqartikkuniuk, pineqartoq inassinnaavaa piffissaliunneqartoq ersarinnerusoq qaangiutsinnagu tamanna pillugu eqqartuussivimmu suliamik aallartitseqqullugu. Inassutigineqartoq malinneqangippat, taamaanneraasimaneq naatsorsuutaajunnaassaaq. Inassuteqarnermi tamanna ilisimatitsissutigineqassaaq.

*Imm. 2.* Ilutsimut piginnaatitaaffeqarneq pillugu eqqartuussivimmi suliaassisoqarsimappat, Patent- og Varemærkestyrelsip suliaq unitsikkallassavaa, eqqartuussivimmi suliap aalajangiiffigineqarnissaata tungaanut.

**§ 30.** Inuk Patent- og Varemærkestyrelsimut qularunnarunnaarsitsippat, qinnuteqartoq imaluunniit ilutsimut piginnittoq pinnani namminerli ilutsimut piginnaatitaaffeqartuulluni, ilutsimut qinnuteqaammi imaluunniit nalunaarsorneqarnermi pineqartumi, Patent- og Varemærkestyrelsip qinnuteqaat imaluunniit nalunaarsorneqarsimaneq pineqartumut nuutsissavaat, taanna tamatuminnga qinnuteqarpat. Inuk, qinnuteqaammik imaluunniit nalunaarsorneqarsimanermik nuutsivigineqartoq, akiliummik aalajangerneqarsimasumik akiliissaaq.

*Imm. 2.* Qinnuteqaatip imaluunniit nalunaarsorneqarsimanerup nuutitsinneqarnissaa qinnutigineqarsimappat, qinnuteqaat allangortinneqassanngilaq, unitsinneqassanngilaq, itigartinneqassanngilaq imaluunniit akuerineqassanngilaq, imaluunniit tamarmiulluni imaluunniit ilamernata nalunaarsorneqarsimanera allangortinneqassanngilaq imaluunniit suujunnaarsinneqassanngilaq, nuutitsinissaq pillugu inaarutaasumik aalajangiisoqarnissaata tungaanut.

**§ 31.** Iluseq inummumut § 1 naapertorlugu piginnaatitaaffeqanngitsumut nalunaarsorneqarsimappat, tamanna pillugu piginnaatitaaffeqartumit taamaanneraasoqarpat, eqqartuussiviup ilutsimut piginnaatitaaffik taassumunnga nuutsissavaa. Ilutsimut piginnaatitaaffik allap pippagu, Patent- og Varemærkestyrelsip piginnaatitaaffeqartumut nalunaarsorsimaneqarneq nuutsissavaa.

*Imm. 2.* Inuk, ilutsip nalunaarsorsimaneranut inuttaanermiit arsaarneqartoq, ajortumik isumaqarani ilutsimik nunami maani atuisimasoq, imaluunniit pineqartoq taamaaliornissaminut annertuumik iliuseqarsimasoq, naleqquttumik akiliteqarnermigut aamma atugassarititaasut naammaginatut atorlugit aallartissimasaminik ingerlatsiinnarsinnaatitaavoq imaluunniit atuissalluni piareersarsimasaminik attassiinnarsinnaatitaavoq taassuma ilisarnaatai nalinginnaasut atorlugit. Aamma licensinik piginnaatitaaffeqartunut piginnaatitaaffiit assinginik atugassartaqartut atuupput.

*Imm. 3.* *Imm. 1* naapertorlugu piginnaatitaaffiit taamaallaat allamut nuutsinneqarsinnaapput ingerlatsivimmu atorneqarfigisaannut, imaluunniit atorneqarfigisaatut siunniunneqarfigisaanut ilaatillugit.

**§ 32.** § 25, imm. 1 malillugu aalajangiineq naapertorlugu ilutsip nalunaarsorsimanerata attatiinnarneqarnissaanut ajoqutaasoqarpat, imaluunniit eqqartuussivimmi aalajangiisoqarsimappat, nalunaarsorneqarsimaneq Patent- og Varemærkestyrelsimit suujunnaarsinneqassaaq. Aammattaaq styrelsi nalunaarsorneqarsimanermik suujunnaarsitsissaaq, ilutsimik piginnittoq piginnittuunerminik atorunnaarsitsippat.

*Imm. 2.* Patent- og Varemærkestyrelsi § 25, imm. 1 malillugu piumasaqaammut tunngatillugu paasisaqaruni, nalunaarsorneqarsimaneq tamarmiutillugu imaluunniit ilaannaakortaa suujunnaarsinneqarsinnaanngitsoq, piumasaqaat itigartinneqassaaq, nalunaarsorneqarsimanerlu atortiinnarneqarluni.

**§ 33.** Patent- og Varemærkestyrelsi ilutsip nalunaarsorneqarsimanerata atorunnaarneranik tamanut nalunaaruteqassaaq. Aammattaaq styrelsi tamanut nalunaaruteqassaaq aalajangiinerup imaluunniit tamarmiutillugu ilaannakortaataluunniit suujunnaansinneqarsimaneranik imaluunniit ilutsimut piginnittuunerup allannut nuunneqarnerata kingunerisaanik ilutsimi nalunaarsorneqarsimasumi allanguutit pillugit.

*Imm. 2.* Ilutsip ilusaata allangortinnerata tamanut nalunaarutigineqarneranut akiliut aalajangersimasooq akilerneqassaaq.

## Kapitali 6

### *Naammagittaalliuut*

**§ 34.** Ilutsimut qinnuteqaammut Patent- og Varemærkestyrelsip inaarutaasumik aalajangiineranut naammagittaalliuut qinnuteqartumit Patentankenævnimut tunniunneqarsinnaavoq. Assinganik atuuppoq ilutsimut piginnittumut, ilutsip nalunaarsorsimaneqarnera tamarmiulluni imaluunniit ilaannakortaa suujunnaarsinneqarpat. Ilutsip nalunaarsorneqarsimaneqarnera ilusaa allangortillugu allangortinnaguluunniit attatiinnarneqarpat, aalajangiineq naammagittaalliuutigineqarsinnaavoq inummit, ilutsip nalunaarsorsimaneqarnerata tamarmiulluni imaluunniit ilaannakuulluni suujunnaarsinneqarnissaanik qinnutiginninnikumit. Kingulliulluni taaneqartup naammagittaalliuutini taamaatikkuarpaguluunniit naammagittaalliuut misilinneqarsinnaavoq, tamatumunnga immikkut ittunik tunngavissaqartoqarpat.

**§ 35.** § 34 malillugu naammagittaalliuut Patentankenævnimut tunniunneqassaaq, aalajangiineq pillugu Patent- og Varemærkestyrelsip pineqartumut ilisimatitsineraniit kingusinnerpaamik qaammatit 2-t kingorna. Piffissaliunneqartumi tassani naammagittaalliummut akiliut aalajangerneqarsimasooq akilerneqassaaq. Taamaaliortoqanngippat naammagittaalliuut itigartinneqassaaq. Patentankenævnimut anngussineq erniinnaartumik atuutilertarpoq.

*Imm. 2.* Patentankenævnip aalajangiineri aqutsinikkut oqartussamut allamut anngunneqarsinnaanngillat.

*Imm. 3.* Patent- og Varemærkestyrelsip aalajangigai, Patentankenævnimut tunniunneqarsinnaasut, ankenævni aalajangiitinnagu, eqqartuussivinnut suliassanngortinneqarsinnaanngillat. Patentankenævnip aalajangiinera eqqartuussivinnut tunniukkusukkaani, suliaq suliassiisutiginneqassaaq kingusinnerpaamik qaammatit 2-t kingorna, ankenævni aalajangiinermik pineqartumut ilisimatitsineraniit. Suliassiisutiginninneq erniinnaartumik atuutilertarpoq.

## Kapitali 7

*Pineqaatissiissutit aamma taarsiissuteqarnissamut akisussaaffik il.il.*

§ 36. Inuk, piaaraluni imaluunniit mianersuaalliorujussuarluni ilutsimut kisermaassisussaatitaalluni pigineqartumut akuliuttoq (designindgrib) akiliisinnegartussanngorlugu eqqartuunneqassaaq.

*Imm. 2.* Unioqqutitsineq piaaraluneerneruppat pissutsillu sukannerulerersitsippata, Kalaallit Nunaanni pinerluttulerinermik inatsit malillugu pineqaatissiisoqassaaq. Pissutsit sukannerulerersitsisut tassaaneruserput, unioqqutitsineri annertuumik ersarissumillu inatsisinut akerliuserumik iluanaarniarerit.

*Imm. 3.* Ingerlatseqatigiiffiit il.il. (tamakku sinnerlugit inatsisitigut ingerlatsisuusut) pinerluttulerinermik inatsisitigut akisussaatinneqarsinnaapput Kalaallit Nunaanni pinerluttulerinermik inatsimmi kapitali 5-mimi malittarisassat malillugit.

*Imm. 4.* Unioqqutitsinerit imm. 1-mi pineqartut, pinerlineqartumit unnerluussissutigineqarsinnaapput. Unioqqutitsinerit imm. 2-mi pineqartut, taamaallaat pinerlineqartup qinnuteqaateqarneratigut unnerluutigineqarsinnaapput, nalinginnaasumik isumassuinissaq eqqarsaatigalugu unnerluussinissaq pisariaqalinngippat.

§ 37. Inuk, piaaraluni imaluunniit mianersuaalliorluni ilutsimut akuleruttoq, akiliissaaq

- 1) pinerlineqartumut atuisimanerminut akiulimmik naleqquttumik aamma
- 2) pinerlineqartumut taarsiissutit ajoqusiinerup unioqqutitsinerup kingunerisaanik annertuseranerit.

*Imm. 2.* Imm. 1, nr. 2 malillugu taarsiissutit aalajangersarneranni isiginiarneqassaaq ilaatigut pinerlineqartup iluanaarutissaraluatut annaasai innarliisullu pissarsiassarinagit iluanaarutai.

*Imm. 3.* Suliani, imm. 1-mi pineqartut saniatigut, pinerlineqartumut aningaasatiguunngitsaq ajoquserneqarnermut taarsiissutissanik aalajangiisoqassaaq.

§ 38. Ilutsimut annertuserumik akuleruttoqaqqinnissaa pinaveersaartinniarlugu piumasagaateqartoqarnerata kingorna eqqartuussiviup eqqartuussinermigut ilaatigut aalajangersinnaavaa, piliap, ilutsimut akulerunnermi piliarineqartup

- 1) niuerfinnit uterteqquneqarnissaa,
- 2) niuerfinnit piivinneqarnissaa,
- 3) suujunnaarsinneqarnissaa,
- 4) pinerlineqartumut tunniunneqarnissaa imaluunniit
- 5) ersarinneruserumik nalunaarutigineqartutut pissusilerlugu allanngortinneqarnissaa.

*Imm. 2.* Imm. 1 assinganik atuuppoq atortunik, sakkuutinik assigisaanillu atuinermi, inatsisinik unioqqutitsilluni pilianik innarliilluni sanaartornermi pingaarnertullugit atorneqarsimasunut.

*Imm. 3.* Imm. 1 malillugu pineqaatissiinerit naammassineqassapput innarliisumut taarsiissutitaqanngitsumik aamma attuumassuteqanngilaq pinerlineqartumut taarsiissutaasussaagunartunut. Pineqaatissiinerit innarliisumut tuttusanngorlugit naammassineqassapput, immikkut ittumik tamatumunnga ajoqutaasoqanngippat.

*Imm. 4.* Imm. 1 malillugu pineqaatissiilluni eqqartuussinermi eqqartuussiviup isiginiassavai innarliinerup annertussusaa, iliusereqquneqarsimasut pingajuusutullu inissisimasup akornanni pissutsit.

*Imm. 5.* Piumasagaateqartoqarnerata kingorna eqqartuussiviup innarliisup imm. 1 aamma 2-mi taaneqartunik pilianik, atortunik, sakkuutinik assigisaanillu tigumiaqarnissaa akuersissutigisinnaavaa, ilutsip imaluunniit taassuma ilaata illersorneqarnerata nalaani naleqquttumik akiliuteqarnikkut. Tamanna taamaallaat atuuppoq

- 1) innarliisoq piarisimannngippat imaluunniit mianersuaalliorsimannngippat,

- 2) imm. 1 malillugu pineqaatissiinerit innarliisumik naleqquttumit annertunerusumik ajoqusiissappata aamma
- 3) akiliut naleqquttoq naammappat.

**§ 39.** Inuit arlaata, qinnuteqaat nalunaarsorneqarnissamik qinnutigineqarsimasup allagartaasa tamanit pissarsiarineqarsinnaangornerata kingorna akuersissutitaqanngitsumik iluseq atorpagu, aamma qinnuteqaat nalunaarsorneqarnermik kinguneqarpat, ilutsimut akulerunneq pillugu aalajangersakkat assinganik atuutissapput. Tamannali atuutinngilaq § 38-mi aalajangersakkamut. Inuk, ilutsimut akulerussimasoq, allagartat sulit tamanit pissarsiarineqarsinnaangunngitsut, aamma taamatumuunakkut iluanaaruteqarsimasoq, § 37 malillugu taarsiissutinik akiliissaaq, naleqquttutut isigineqartunik, taamaattorli ilutsimut akulerunnermi iluanaarutaasussaagaluartutut isigineqartunit annertuneruallaanngitsunit.

*Imm. 2.* Imm. 1 malillugu taarsiissutinik piumasaqaatit pisoqalivallaarnissaat siusinnerpaamik pisinnaavoq ilutsip nalunaarsorneqarneraniit ukiup 1-ip kingorna.

**§ 39 a.** Eqqartuussinermi, inuup §§ 37 imaluunniit 38 malillugu eqqartuunneqarnerani, eqqartuussiviup qinnuteqaateqarfigineqarnermigut aalajangersinnaavaa, eqqartuussinerup tamarmiulluni imaluunniit ilaannakortaasa tamanut saqqummiuneqarnissaat.

*Imm. 2.* Tamanut saqqummiussinissamut pisussaaffik innarliisumiippoq. Tamanut saqqummiineq innarliisumit akilerneqassaaq naleqquttutullu nalilerneqarsinnaasumik saqqumissuseqassalluni.

**§ 40.** Ilutsimut akulerunnerit pillugit suliat taamaallaat atortuutinneqarsinnaapput, ilutsimut kisermaassilluni piginnaatitaaffeqartoqanngippat, nalunaarsorneqarsimanerup suujunnaarsinneqarnissaanik piumasaqaat ilutsimik piginnittumut atorunnaarsinneqarpat, imaassinnaavoq taassuma § 45-mi malittarisassat malillugit eqqartuussassanngortinneqarnerata kingorna. Nalunaarsorsimaneqarneq suujunnaarsinneqarpat §§ 36 – 39-imi aalajangersakkat atorneqassanngillat.

**§ 41.** Inuk, § 22-mi pissutsinik taaneqartunik pisussaaffimminik malinninngitsooq, imaluunniit eqqunngitsunik paasissutissiisoq, akiliisitaanermik pillarneqassaaq, inatsisit allat malillugit sakkortunerusumik pillagassaasimanngippat, tassuunakkullu ajoqusiimanermi annertussusaa malillugu naleqquttutut isigineqartunik taarsiisussanngorluni.

*Imm. 2.* § 36, imm. 3 aamma 4-mi aalajangersakkat assinganik atuupput.

**§ 41 a.** Akileraarusersuineq akileraarutillu pillugit ingerlatsivik innarliinernik § 36-imi pineqartutut ittunik ilimatsaassaqaruni tamakku pillugit paasissutissanik piginnaatitaaffimmik pigisaqartumut ingerlatitseqqissinnaavoq.

## Kapitali 8

### *Eqqartuussisarnermut aalajangersakkat*

**§ 42.** EF-imi ilutsinut peqqussut naapertorlugu Sø- og Handelsretten ilutsinut tunngasunut sallertut inissisimalluni eqqartuussiviuvoq Højesteretilu tullertut inissisimalluni ilutsinut tunngasunut eqqartuussiviulluni.

**§ 43.** EF-imi ilutsinut peqqussut naapertorlugu inerteqqutit eqqartuussutinik naammassisisartunit atorunnaarsinneqartassapput.

*Imm. 2.* EF-imi ilutsinut peqqussut naapertorlugu inerteqqutit, naalagaaffiit ilaasortaasut susassaqrifiini tamani atuuttussaasut, SØ- og Handelsrettenimit atorunnaarsinneqartassapput.

*Imm. 3.* EF-imi ilutsinut inatsisip aamma inatsisip taassuma kingunerisaanik ilutsinut allanut illersorneqartunut tunngasunut inerteqqutit, SØ- og Handelsrettenimit atorunnaarsinneqartassapput, EF-imi ilutsinut inatsisinut tunngatillugu inerteqqut naalagaaffinni ilaasortaasut susassaqrifiini tamani atuutissappat.

*Imm. 4.* Eqqartuussisarnermik inatsimmi kapitali 57-imi aalajangersakkat assinganik atuupput.

*Imm. 5.* Imm. 2 aamma 3 malillugu SØ- og Handelsrettenip aalajangigai Østre Landsretimut ingerlateqqinneqarsinnaapput.

**§ 44.** Inuk, ilutsip tamarmiulluni imaluunniit ilaannakuata nalunaarsorsimaneqarnerata suujunnaarsinneqarnissaanik eqqartuussivimmumt suliaassanngortitsisoq imaluunniit nalunaarsorneqarsimanerup nuunneqarnissaanik, tamatuminnga Patent- og Varemærkestyrelsimut nalunaarutiginnissaaq tamatuma ilutsinut nalunaarsuiffimmi ilanngunneqarnissaa pillugu kiisalu allakkat tammatsaalitigut eqqartuussivimmumt suliaassanngortitsineq pillugu ilisimatitsissalluni licensiutilinnut tamanut, nalunaarsuiffimmi najugaat ilanngullugit allatorneqarsimasunut. Licensimik piginnittoq ilutsimut kisermaassisussaaffigineqarluni pigineqartumut akuliunneq pillugu eqqartuussivimmumt suliaassanngortitsisoq, assigisaanik tamanna pillugu ilutsimut piginnittumut ilisimatitsissaaq.

*Imm. 2.* Suliassiusup, imm. 1-imi nalunaarneqarsimasut nalunaarutiginninnerup nalunaaruteqarnerullu pisimanerat suliaassanngortitaminit piunasaqaataasut uppersanngippagit, eqqartuussivik piunasaqaatit eqquutinneqarnissaannut piffissaliisinaavoq. Piffissaliussaq qaangerneqarpat suliaq itigartitsissutigineqassaaq.

**§ 45.** Ilutsimut kisermaassisussaataffaqqarluni pigineqartumut akuliunnerit pillugit suliani ilutsimut piginnittumit suliaassanngortitani suliaassanngortitaasup § 44, imm. 1-imi malittarisassat malillugit Patent- og Varemærkestyrelsimut licensimillu piginnittunut nalunaarsorneqarsimasunut ilimatitsissutigissavaa, suliaassanngortinneqartup nalunaarsorsimaneqarnerup suujunnaarsinneqarnissaanik oqaaseqaatigineqarsimasoq atorunnaarsinniaruniuk. § 44, imm. 2-mi aalajangersagaq assinganik atuuppoq, taamaalilluni nalunaarsorneqarsimanerup suujunnaarsinneqarnissaanik oqaaseqaatigisimasaaq itigartinneqassalluni, piffissaliullugu aalajangerneqarneqarsimasoq qaangerneqarpat.

*Imm. 2.* Ilutsimut kisermaassisussaataffaqqarluni pigineqartumut akuliunnerit pillugit suliani licensimik piginnittumit suliaassanngortitani suliaassanngortinneqartup ilutsimik piginnittoq suliaassanngortissinnaavaa taassuma eqqartuussiveqarfisaa innimiginagu piginnittumullu nalunaarsorsimaneqarnerup suujunnaarsinneqarnissaanik oqaaseqaatigisimasaaq atorunnaarsillugu. Kalaallit Nunaanni eqqartuussisarnermik inatsimmi kapitali 19-imi isumaqatigiinniarnerni pingaarnerit pillugit aalajangersakkat assinganik atuupput.

**§ 46.** §§ 27- 29, 31, 32 aamma 36 – 39-imi suliani pineqartuni eqqartuussinernik takussutissiat eqqartuussiviup iliuuseqarneratigut Patent- og Varemærkestyrelsimut nassiunneqassapput.

## Kapitali 9

### *Aalajangersakkat assigiinngitsut*

**§ 47.** Patent – og Varemærkestyrelsen ilutsumut qinnuteqartoq kiisalu ilutsumik nalunaarsorneqarsimasumik piginnittoq kajumissaarsinnaavai fuldmægtigimik toqqaqqullugit, Det Europæiske Samarbejdsområdet imaluunniit Kalaallit Nunaanni najugalimmik, namminneq sinnerlutik qinnuteqaammut imaluunniit nalunaarsorneqarsimanermut tunngatillugu saqqummertartussaq. Fuldmægtigip aqqa najugaalu ilutsumut nalunaarsuiffimmu ilanngunneqassaaq.

**§ 48.** Ilutsumik qinnuteqartoq inatsisitigut annaasaqassappat Patent- og Varemærkestyrelsimut inatsimmu matumunnga imaluunniit tamatumunnga tunngaveqartumik piffissaliunneqarsimasup malinngitsoorsimaneq pissutigalugu, Patent – og Varemærkestyrelsen qinnuteqarfigineqarnermi kingorna piginnaatitaaffiit pilerseqqissavai, ilutsumik qinnuteqartup peqqissaarsinnaanini namminerminut piumasarsineqarsinnaasoq tamaviaarullugu iliuuseqarsimanini takutippagu. Qinnuteqaat Patent- og Varemærkestyrelsimut tunniunneqassaaq kingusinnerpaamik qaammatit 2-t qaangiutsinnagit, ajoqutaasimasup, piffissaliunneqartumik qaangiisitsisup, atorunnaarneraniit, piffissaliunneqartulli naaneraniit ukiup 1-ip kingorna. Piffissaliunneqartumi tassani qinnuteqartup iliuuserinngitsoorsimasani suliarissavaa pilersitseqqinnermullu akiliut aalajangersarneqarsimasoo akilerlugu.

*Imm. 2.* Imm. 1-imi aalajangersagaq assinganik atuuppoq, ilutsumut piginnittoq nutarterisitsinermut akiliut § 24, imm. 1-imi piffissaliunneqarluni aalajangerneqarsimasup iluani akiliinngippat, tassani pilersitseqqinnermut qinnuteqaateqarneq tunniunneqarsimassaaq nutarterisitsinermullu akiliut akilerneqareersimassalluni kingusinnerpaamik piffissaliussap qaangiunneraniit qaammatit 6-it kingorna.

*Imm. 3.* Imm. 1 aamma 2-mi aalajangersagaq assinganik atuuppoq Patentankenævniit piffissaliunneqarsimasunut. Piginnaatitaaffinnik pilersitseqqinnerit Patentankenævniimi pisarput.

*Imm. 4.* Imm. 1-imi aalajangersakkat § 16-imi piffissaliullugit taaneqarsimasunut atuutinngillat.

**§ 49.** Økonomi- og erhvervsministeri ilutsumut qinnuteqaatit pillugit ersarinnerusunik aalajangersakkanik aalajangersaassaaq taakkulu suliarineqartarnerannut, pingaarnersiuneramik salliutinneqartarnerannut, ilutsumut qinnuteqaatit agguarneqartarnerannut nalunaarsorneqartarnerannullu, nutarterisitsinernut taamaatitsisarnernullu kiisalu Patent- og Varemærkestyrelsimik Patentankenævniimillu suleqateqarnermi qarasaasiakkut paasissutissanik paarlaasseqatigiittarnermut, Dansk Designtidendeq imarisaanut saqqummersinneqartarneranullu kiisalu aamma Patent – og Varemærkestyrelsen suleriaasaanut. Tassunga ilanngullugu aalajangerneqarsinnaavoq Patent – og Varemærkestyrelsen qinnuteqaatinut tigusimasaminut toqqortaasa kimilluunniit pissarsiarineqarsinnaanissaat. Økonomi- og erhvervsministeri malittarisassanik ersarinnerusunik aalajangersaasinnaavoq, Patent- og Varemærkestyrelsimut ullut sorliit matoqqaffittut isigineqassanersut.

*Imm. 2.* Økonomi- og erhvervsministerip EF-imi ilutsumut pillugit peqqussutip atornissaanut pisariaqartut aalajangersassavai.

*Imm. 3.* Økonomi- og erhvervsministerip aamma ilutsumik qinnuteqaatit nalunaarsorneqarnissaanut aamma ilutsumut nalunaarsorsimaneqarneranik nutarterinermut tunngatillugu suliani suliarinninnermut akiliutinik aalajangersaasinnaavoq. Økonomi- og erhvervsministerip aamma EF-imi ilutsumik suliaqarnermi akiliutinik aalajangersarsinnaavai.

**§ 50.** Iluseq nalunaarsorneqarsimasooq aamma piginneqqaartussaanermut inatsit malillugu illersorneqarsinnaavoq, Kalaallit Nunaannut atuutilersinneqarsimasooq piginneqqaartussaanermik inatsit pillugu peqqussutip Kalaallit Nunaannut atuutilersinneqarneratigut, piffissamut, ilutsumut pilersinneqarneraniit imaluunniit ilusissavimminut aalajangerneqarneraniit.

**§ 51.** Iluseq allamit pigineqalerpat, licensi tunniunneqarsimassaaq, iluseq sallunaveequsiunneqarsimappat, iluseq akiliutissanngortinneqarsimassaaq, imaluunniit ilutsimik piginnittoq akiliisinnaajunnaartutut suliarineqalerpat, tamanna ilutsinut nalunaarsuiffimmi qinnuteqaatigineqarneratigut allassimaffinnut allanneqassaaq. Assinganik atuuppoq ilutsimik pilersitsisup aqqanik allassimaffinnut ilanngussinermi kiisalu § 31, imm. 2 naapertorlugu piginnaatitaaffinnut.

*Imm. 2.* Imm. 1 naapertorlugu ilutsinut nalunaarsuiffimmi allassimaffinnut ilanngunneqarnissamik, allannguuteqartitsinissamik imaluunniit paasissutissat peerneqarnissaanik qinnuteqaateqarnermi uppersaait pisariaqartut pigineqassapput. Aamma qinnuteqaateqarnermut akiliut aalajangersimasooq akilerneqassaaq.

*Imm. 3.* Ilutsinik arlalinnik nalunaarsuineri, tak. § 15, ilutsimut kisermaassisussaatitaanerup allamut nuunneqarnerani taamaallaat nalunaarsuiffimmi allassimaffinnut ilanngunneqarsinnaapput, nuussinermi ilutsit tamarmik pineqarpata.

*Imm. 4.* Ilutsimut tunngatillugu eqqartuussisunut suliassanngortitsinermi nalunaarsuiffimmi ilutsimik piginnittutut allassimaffinni allanneqarsimasup tunniunneratigut tamatigut pisinnaapput, aamma Patent- og Varemærkestyrelsimit nalunaarutit piginnittumut nassiunneqarsinnaapput.

**§ 52.** Patent- og Varemærkestyrelsi qinnuigineqarnermi kingorna ilutsimut ilutsimullu kisermaassisussaatitaanerumut tunngatillugu suliassat immikkut ittut suliarisinnaavai.

*Imm. 2.* Innuttaasut ammasumik sullinneqarnissaanut inatsit atuuppoq, § 4, imm. 2 minillugit, suliassanut imm. 1-imi taaneqartunuunngitsooq.

*Imm. 3.* Økonomi- og erhvervsministeri taamatut sullissinermik ingerlatsinermut malittarisassanik aalajangersaasaaq aamma tamatumunnga akiliisarnissamat kiisalu kingusinaarluni akiliinermi eqqaasitsissutinik allagaqaqqinnermut akiliutip akilerneqarnissaanut.

## Kapitali 10

### *Nunat tamat akornanni ilutsinik nalunaarsuineq*

**§ 53.** Nunat tamat akornanni ilutsinik nalunaarsuineq paasineqassaaq Genève-imi ulloq 2. juli 1999-imi nunat tamat akornanni ilutsimik nalunaarsuinerumut (Genève-aftalen) tunngatillugu Haag-arrangementet-imi akuersissutigineqarsimasup allannguutaa naapertorlugu nalunaarsuineq.

**§ 54.** Nunat tamat akornanni ilutsinik nalunaarsuineq Danmarkimi atuuttoq assinganik inatsisitigut atuuffeqarpoq, ilutsip maani nunami nalunaarsorneqarsimaneratut.

**§ 55.** Nunat tamat akornanni ilutsimik qinnuteqaat Patent- og Varemærkestyrelsimut imaluunniit Det Internationale Bureauimut tunniunneqassaaq. Nunat tamat akornanni ilutsimik qinnuteqaat Patent- og Varemærkestyrelsimut tunniunneqassaaq danskisut innuttaassuseqartumeersoq kiisalu inuinnarnit imaluunniit inatsisitigut taakku sinnerlugit ingerlatsisuusuneersut, Danmarkimi najugaqartuusut imaluunniit Danmarkermiuusut, imaluunniit Danmarkimi suliffissuarmik imaluunniit niuerfimmik piginnittuusut.

**§ 56.** Nunat tamat akornanni ilutsimik qinnuteqaammik tunniussinermi nunamit, Parisimi isumaqatigiisummut ilaasumit, imaluunniit Verdenshandelsorganisationimut (WTO) ilaasortaarsumit tullerijaaarnermi salliutinneqarnissaaq patsisilersuutigineqarsinnaavoq.

§ 57. Patent- og Varemærkestyrelsen piffissaliussaq, Genèvevi isumaqatigiissummi aalajangerneqarsimasooq nallertinnagu, Det Internationale Bureau ilutsip Danmarkimi tamarmiulluni imaluunniit ilaannakuulluni itigartitsissutigineqarneranik ilisimatissavaa, ilutsip inatsit manna malillugu nalunaarsorneqarnissamut piumasqaatit eqquutissimangippagit.

§ 58. Nunat tamat akornanni ilutsip nalunaarsorneqarneranik nutarterinermut malittarisassat, Genèvevi isumaqatigiissummi aalajangerneqarsimasut atuupput.

§ 59. Økonomi- og erhvervsministeri kapitalimi matumani aalajangersakkat naammassineqarnissaannut malittarisassanik ersarinnerusunik aalajangersaasaaq. Tassunga ilanngullugu nunat tamat akornanni ilutsip nalunaarsorneqarsimasut tamanut saqqummiunneqarnissaannut malittarisassat immikkut ittut aalajangerneqarsinnaapput. Aamma Økonomi- og erhvervsministerip matumunnga atatillugu suliat suliarineqarnerannut akiliutit aalajangersarsinnaavai.

## Kapitali 11

### *Atuutilersitsinermut aamma ikaarsaariarnermut aalajangersakkat*

§ 60. Peqqussut atuutilerpoq ulloq 1. juli 2010.

*Imm.* 2. Peqatigitillugu allaliussat pillugit inatsit atorunnaarsinneqarpoq, tak. Kalaallit Nunaannut inatsimmut nalunaarut nr. 251, 17. april 1989-imeersoq.

§ 61. Ilutsinut inatsit malillugu najoqqutassat atuutilersinneqarsimasut aamma Kalaallit Nunaannut atuupput.

Tunniunneqarpoq Christiansborg Slotimi, ulloq [ulloq qaammat ukioq]

MARGRETHE R.

/Lene Espersen